

E whakamārama ana tēnei pukameka i ngā tautoko ka taea e koe, ā, me te hunga hei tonono āwhina māu mēnā ka pāngia koe e tētahi kōhurutanga.

Ko te mate o tētahi tangata tino tata ki a koe he āhuatanga tino ngaukino. Ka āwhina te tautoko tika i a koutou ko tō whānau ki te whakarite i te pānga o te taihara. He tari ki tō takiwā e whakarato tautoko mātanga ā-aurongo, ā-tinana hoki.

Kia mōhio ake, tēnā waea atu ki te Waea Mōhiohia Pārurenga ki 0800 650 654. Tirohia hoki te mutunga o te puka nei mō ngā taipitopito whakapā anō, me ētahi o ngā kupu ka rangona i te kōti.

Ngā motika o te pārurenga

E whai motika ana koe kia whakamōhiohia koe mō ngā ratonga hei āwhina i a koe, kia whakamōhiohia hoki koe mō te kēhi i roto i te kōti me te mōhio anō ki ngā mea ka pā mai ina haere koe ki te kōti.

E whai tika ana koe ki te kōrero atu ki te kōti mō te pānga mai o te taihara ki a koe. Mēnā ko koe te pārurenga o tētahi taihara nā te tamaiti, taiohi rānei, e whai tika ana koe ki te haere ki tētahi hui rōpū ā-whānau me te tuku kōrero anō mō ngā mea e hiahia ana koe kia puta.

I ētahi kēhi, e whai motika ana koe, tō māngai rānei, ki te kōrero mō ngā mea pēnei i te pēhanga ingoa, te utu here, te whakarautanga kāinga, te tukuhere rānei.

Ko te tikanga ka hūmārika, ka aroha, ka whakaute hoki ngā āpiha kōti, ngā Pirihimana me ētahi atu i roto i te kēhi. E whai motika ana koe ki te tūmataitinga.

Kei te Puka Pārurenga ētahi atu kōrero e hāngai ana ki ō motika me ngā whakaritenga e tūmanakotia ana mōu. Kia mōhio ake, tirohia victimsinfo.govt.nz

Mēnā ki ō whakaaro kāore i tutuki ō motika, kāore rānei i pai ngā ratonga ki tāu i tūmanako ai, e oti i a koe te tuku amuamu. Tirohia victimsinfo.govt.nz waea atu rānei ki te Waea Mōhiohia Pārurenga ki 0800 650 654.

Te whakatewhatewhanga

He tino uaua tētahi whakatewhatewhanga kōhuru mō te whānau me ngā hoa o te pārurenga. Mēnā he pārurenga

tētahi o tō whānau nā te kōhurutanga, he mea nui te tiki i ngā tautoko tika.

Ka tohua e ngā Pirihimana tētahi pirihimana takawaenga ki tō whānau. Ka whakaritea e ia kia noho mōhio koe ki ngā āhuatanga puta noa i te whakatewhatewhanga me te kēhi kōti. Ka taea anō e ia te whakautu i ō pātai katoa me te tūhono atu i a koe ki ngā tari tautoko motuhake.

Ahakoia he tino uaua mō te whānau, tērā pea me noho te tangata hemo ki te wāhi kei reira ia kia kohia rā anō ngā taunakitanga. Ka tirohohia anō e tētahi tākuta tauwhāiti, he kairangahau mate. Ko te kaupapa o tēnei he whakaemi i ngā taunakitanga hira mō te kēhi kōti.

Ko te tikanga he roa te wā o tētahi whakatewhatewhanga kōhuru. Me mātua whakaatu ngā Pirihimana i aha, nā wai i mahi, ā, he aha tō rātou whāinga. Ka whakamōhiohia haerehia tō whānau e te pirihimana takawaenga me te āwhina i a koe ki te whakariterite i te tangihanga, me ētahi atu whakaritenga.

I te wā o te whakatewhatewhanga, ka uiuihia pea e ngā pirihimana ētahi mema o tō whānau, me ētahi atu tāngata, me te kohi taunakitanga pēnei i ngā whakaahua me ngā whakamātautau e pā ana ki te whare whakawā. Mēnā he rahi ngā taunakitanga a ngā Pirihimana, ka hopukina ā-ture te tangata me te whakapā hē i a ia ki tētahi taihara.

TE UTU HERE (BAIL)

Ina hopukina tētahi, tērā pea ka tukuna ia kia haere kia tae rawa ki te wā e tū ai ki te kōti. E kīia tēnei te utu here, te peira rānei. I ētahi wā kei reira ngā here mō te wāhi noho o te tangata me te rāhui haere pō. Mēnā ka whakaaro ngā Pirihimana ka raru koe, ētahi atu i te hāpori rānei ka mauherehia te tangata tae rā anō ki te haerenga ki te kōti, i reira ka taea e ia te tonono utu here anō.

TE RĒHITA WHAKAMŌHIO PĀRURENGA

Ka riro i a koe te wā kia whakaputa kōrero e hāngai ana ki te whakarere o te tangata kua tukuhere (tirohia hoki “Ka taea e koe te kōrero atu ki te Poari Tukuhere mō ō whakaaro mō te tukunga o te tangata hara” ki te mutunga o te puka nei).

Kei a koe te tikanga ki te whakauru atu ki Te Rēhita Whakamōhio Pārurenga kia noho mōhio haere koe mō ngā pānga ki te tangata hara a muri i te whakawhiu. Mēnā e hiahia ana koe, ka taea te kōwhiri tētahi tangata ki te whiwhi i ēnei kōrero mōu. Ka noho matatapu ngā taipitopito mōu.

Kia kitea rānei mēnā kei te tika ō taipitopito whakapā ki te rēhita, me whakapā atu ki ngā Pirihimana, ki Te Ara Poutama o Aotearoa, ki tō tari tautoko rānei. Kia mōhio ake, tirohia victimsinfo.govt.nz

Me tiro e te kaiwhakawā ngā mea maha i a ia e whakawhiu ana i te tangata hara, pēnei i ngā whakawhiunga kua tukuna mō ngā taihara ōrite, ngā pūrongo e pā ana ki te tangata hara, me ngā tauākī pārurenga.

TE TAUĀKĪ PĀRURENGA

Me he pārurenga koe o tētahi taihara, ka pātaihia koe mēnā he tōmina tōu kia tuku tauākī pārurenga. E whakamārama ana tēnei i te pānga o te taihara ki a koe. Ka taea e te pirihimana whakahaere i tō kēhi, e Manaaki Tāngata, e tētahi atu pokapū rānei te āwhinatia koe ki te tuhi i tēnei tauākītanga. Tirohia hoki “Te whakataunga me te whakawhiu” ki te mutunga o te puka nei.

Tautoko

E wātea ana ngā ratonga tautoko whānui hei āwhina i a koe.

MANAAKI TANGATA: RATONGA TAUTOKO KAIMAHI PĀRURENGA KŌHURU

He ratonga mātanga tēnei hei āwhina i a koutou ko tō whānau i roto i ngā wāhanga katoa o te hātepe, ā, me muri anō i te mutunga o te kēhi. Ka whakatūturu i tō riro tautoko ā-aurongo. Ka tūhonoa atu koe e ngā Pirihimana ki tēnei ratonga, e oti rānei i a koe te whakapā atu ki Manaaki Tāngata ki 0800 842 846.

NGĀ TAUTOKO TOHUTOHU MĀTANGA

Ko ngā whānau me ngā hoa o ngā pārurenga kōhuru, ngā kaiwhakaatu me ngā tāngata i tae tuatahi atu ki te kōhurutanga ka whiwhi i ngā huinga tohutohu tae atu ki te 30. Whakapā atu ki Manaaki Tāngata ki te rapu mōhio mō tō āhei, me ngā tohutohu tono hoki.

TE TAIHARA TAIOHI

Mēnā nā tētahi taiohi i raro i te pakeke 17 tau te taihara, ka whakaritea te take mā te hātepe ture taiohi. He nui te mana

o ngā pārurenga i roto i te hātepe ture taiohi, ā, e whai motika ana koe ki te haere ki tētahi hui rōpū ā-whānau.

Mā tētahi kaiarahi whānau nō Oranga Tamariki - the Ministry for Children koe e whakapā atu.

HE TAUTOKO Ā-PŪTEA

E wātea ana ētahi pūtea hei āwhina i a koe ki te utu i ētahi o ngā nama e pā ana ki te taihara. Mō te tiro tiro mēnā e oti i a koe te whiwhi pūtea, ā, me pēhea hoki te tono atu, tēnā whakapā atu ki Manaaki Tāngata ki 0800 842 846.

- Atu ki te \$5000 e wātea ana ki te whakaiti i ngā pānga o te kōhuru ki te whānau ake. Ka āwhina ki te whakakapi i te kore moni whiwhi me ngā whakapaunga whānui.
- He \$124 mō ia rā kotahi (\$62 mō ia rā haurua) e wātea ana ki ia o ngā tāngata pakeke o te whānau tae rā anō ki te tokorima mō te haere ki ngā whakawātanga Kōti Matua.
- E wātea ana ngā pūtea tautoko mō te haerenga atu, te wharenoho, me ngā utu hāngai mā ngā tāngata tae rā anō ki te tokoono hei haere ki te kōti me ngā whakawātanga Poari Tukuhere.
- Atu ki te \$10,000 hei āwhina i ngā utu o te tangihanga. Whakapā atu ki ACC kia tonoa.

Ka āhei anō pea koe ki ētahi atu āwhina ā-pūtea mai i ACC. Uia atu tō pokapū tautoko ki te rapu mōhiohio atu anō, waea atu rānei ki te Nama Waea Kerēme Pāwera tā ACC ki 0800 101 996.

I te kōti

Ko te tikanga he maha ngā tūnga a te whakatuaki ki te kōti (te tangata e whakapaengia ana kua taihara) hei tauira, ki te whakapuaki he hara tōna, he kore hara rānei, kia tirohia rānei e te kaiwhakawā ngā taunakitanga o te kēhi. Ko te tikanga kāore koe e herea ki ēnei whakawātanga katoa, heoi, me he tōmina tōu, e oti i a koe te haere. Kāore koe e herea ki te tae atu ki te kōti mō te whakawātanga whakawhiu.

Mēnā ka whakapuaki te whakatuaki kua hara ia, ko te mea kei te whakaae ia nāna te taihara e whakapaengia ana ia. Ka tīmata te kōti ki te whiriwhiria te whakawhiunga ka whiwhi ki te tangata taihara.

Kei te āhua tonu o te kino o ngā whakapaetanga, ka whakawhiua kātahi tonu te tangata hara e te kōti, ka tono rānei ki tētahi pūrongo whakawhiu a mua i te whakawhiu i te tangata hara ā tētahi atu rā. Kua whakaritea ēnei pūrongo e ngā kaitukuhere, ā, i te nuinga o te wā, tae rā anō ki tōnā toru wiki kia rite.

I ētahi wā, ka wātea koe kia tae atu ki tētahi hui paremata whakahaumanu.

Ki te whakapuaki te whakapaenga kāore ia i te hara, ka whakatakotohia e te kaiwhiu te kēhi ki te kaiwhakawā me te rōpū whakawā. Ka mahi te kaiwhiu mā te kāwanatanga, ā, kei a ia te kawenga mō te kōkiri kēhi mō te Karauna, ngā Pirihimana me te iwi whānui. Tērā pea ka hiahia kia tū koe hei kaiwhakaatu mō te Karauna hei āwhina ki te hāpono i te kēhi ki te whakatuaki tirohia “Te tū hei kaiwhakaatu” ki te mutunga o te puka nei.

Ka tūtaki te kaiwhiu ki a koutou ko tō whānau me te kōrero atu he aha ngā whakapae ka whakatakotohia me te take, ā, he aha hoki ka puta pea i te kōti. Nā runga i te āhuatanga o te kēhi, he kōhuru pea te whakapā hē, he matenga pokorehū rānei. Ka whakamārama te kaiwhiu i tēnei ki a koe.

Ka tuku whakatau pea te kōti e ārai ana i te tangata mai i te whakaputa i te ingoa o te pāpurenga, ōna taipitopito e mōhiotia ai ko wai ia. Ka whakamārama te kaiwhiu i tēnei ki a koe.

TAUTOKO Ā-REO, Ā-HAUĀ RĀNEI

Me kōrero atu koe ki tō kaitohutohu pāpurenga kōti, tō pirihimana takawaenga, tō kaimahi tautoko rānei mēnā e hiahia ana koe ki ngā momo āwhina hauā, whakamāori reo rānei i roto i te kōti.

TŌ HAUMARU KI TE KŌTI

He mea nui tō haumaruru. Mēnā kei te āwangawanga koe i tō haumaruru ki te kōti, tēnā, kōrero ki tētahi pirihimana, tētahi kaiwhakahaumaruru o te kōti, whakamōhiotia atu tō kaitohutohu pāpurenga rānei a mua i tō taenga ki te kōti.

Tērā pea ka aro mai te hunga pāpāho ki te kēhi me te tono kōrero mai i tō whānau. Ka taea e tō pirihimana takawaenga te tuku tohutohu ki a koe mō te whakariterite i te hunga pāpāho.

KAITOHUTOHU PĀPURENGA KŌTI

Ina tū tuatahi te whakapaenga ki te kōti, ka whakapā atu tētahi kaitohutohu pāpurenga kōti ki a koe. Nāna ake te mahi ki te whakamōhiotia haere ki a koe mō te ahunga o tō kēhi, ā, me te āwhina i a koe mā roto o te hātepe kōti. Ka taea ano e ia te kōrero atu ki a koe me haere koe ki hea tiki tautoko ā-ngākau, ā-pūtea hoki.

Kei reira anō te kaitohutohu pāpurenga kōti, te āpiha pirihimana takawaenga pāpurenga, tō kaimahi tautoko rānei ki te whakamārama ki a koe ngā mea kāore koe i te mārama.

Kia mōhio ake, toro atu ki victimsinfo.govt.nz. Ka taea e koe te whakapā hāngai atu ki tō kaitohutohu pāpurenga kōti, mā te Waea Mōhiotia Pāpurenga rānei ki 0800 650 654.

Te noho hei kaiwhakaatu

I te wā o te whakawātanga, tērā pea ka karangahia koutou me ētahi o tō whānau hei kaiwhakaatu. He āhuatanga ahotea pea te tū hei kaiwhakaatu. Ka taea e tō kaiwhiu me tō kaitohutohu pāpurenga kōti te whakamārama i ngā āhuatanga, me ngā mea hei tūpono māu. Ka taea hoki e koe te kimi āwhina mai i tō pirihimana takawaenga.

I MUA I TE KŌTI

Ka kōrero atu te pirihimana takawaenga, te kaitohutohu pāpurenga kōti rānei ki a koe mō te wā me te wāhi me tae koe ki te kōti. Ka tukuna hoki tētahi pānui whaimana ki a koe ki tō kainga.

Ka kōrero atu te kaiwhiu ki a koe mō te wāhi ki a koe hei kaiwhakaatu. Ka taea anō e koe te tono ki te toro tōmua i te rūma kōti. Kōrero atu ki tō kaitohutohu pāpurenga kōti, te pirihimana takawaenga pāpurenga, tētahi kaimahi tautoko rānei ki te whakarite i tēnei. Waihoki, whākina atu ki tō kaitohutohu pāpurenga kōti te pirihimana takawaenga pāpurenga rānei mēnā kei te hiahia koe kia whakaritea:

- he tangata ki te tūtaki i a koe ki te kōti, i waho rānei
- he kaitautoko hei noho i tō taha i a koe ina tuku taunakitanga.

I TE KŌTI

Ka uia koe mō ngā mahi me ngā āhuatanga i pā mai ai, mō ō mōhio rānei ki ngā āhuatanga o te taihara.

I a koe e tuku taunakitanga ana, i te nuinga o te wā, e oti i a koe te kite i te whakatuaki, hāunga i a koe e tukuna atu ana nō muri i tētahi ārai, ā-pouaka whakaata ara iahiko rānei.

I roto i te nuinga o ngā kōti, he wāhi tatari motuhake mō te hunga kaiwhakaatu engari ka kitea tonutia pea e koe te whānau me ngā hoa o te whakapaenga huri taiāwhio i te kōti.

He mea nui kia kimihia tautoko e koe hei kaiwhakaatu i mua i te rā kōti, me taua rā tonu. Me kōrero koe ki tō kaitohutohu pāpurenga kōti, kaimahi tautoko rānei mō te tiki tautoko e tika ana mōu.

Te whakataunga me te whiu

I te mutunga o te whakawātanga, ka kitea mēnā i hara, korehara rānei te whakatuaki. I ētahi ka whakatau te kōti kāore te whakapaenga i te hara nā te wairangitanga te take.

I ētahi kēhi, hei tauira, ina kāore e taea e te rōpū whakawā te whakatau, ka tū anō pea tētahi atu whakawā.

Mēnā ka kitea kua hara te tangata, ka whakatauhia he rā a muri mai mō tana whiu. Mā tō pirihimana takawaenga, tō kaitohutohu pāpurenga kōti, tō kaiwhiu rānei e kōrero atu ki a koe mō te wā kua whakaritea mō te whakatau whiu.

Ki te whakatauhia he harakore te whakatuaki nā te wairangitanga, ka puritia pea ia mō te maimoatanga ki tētahi whare hauora ā-hinengaro whita. Ka whakapā atu tētahi kairuruku pāpurenga mai i te whare wairangi ki te whakamāmara i te tikanga o tēnei ki a koe.

WHAKATAU WHIU

E herea ana te kaiwhakawā i raro i te ture kia whai whakaaro ki ngā āhukatanga maha ina whakatau whakawhiu ia ki te tangata hara, pēnei nā, he aha ngā whakawhiu o mua mō ngā taihara ōrite me ngā pūrongo mō te tangata hara.

Ki te whakaae te kaiwhakawā, ka taea e koe (e tētahi atu rānei i tohua e koe) te pānui tētahi wāhanga, te katoa rānei o tō tauāki pāpurenga i roto i te kōti i te whakawātanga whiu. Pātai atu ki tō kaitohutohu pāpurenga o te kōti, te pirihimana takawaenga pāpurenga rānei ki te tuku i tēnei tono māu ki te kaiwhakawā mōu. E herea ana te kaiwhakawā ki te whai whakaaro ki tō tauāki pāpurenga ina whakawhiu ia i te tangata hara.

NGĀ PĪRA

He motika tō te kaiwhiu me te tangata hara ki te pīra i te whakataunga me te whiu. Ko te tikanga o tēnei ka riro mā tētahi kōti teitei ake e tirotiro anō te kēhi. Ki te pēnei, ka whakamōhiohia koe e te kaiwhiu mō te hātepe.

I muri i te kōti

Ina whakatauhia kei te hara, ka whakawhiua te tangata hara. Ehara i te mea he ngāwari te whai māramatanga ki ngā whiu. Mā tō pirihimana takawaenga, tō kaitohutohu pāpurenga kōti rānei e whakamārama atu i te tikanga o te whiu.

TE TUKUNGA I TE WHARE HEREHERE

Ka tukuna ngā tāngata hara mai i te whare herehere i runga i te tukuhere, i te mutunga rānei o tā rātou whakawhiu. Ka tukuna pea i mua o te wā e tūmanakohia ana e koe, engari ka uru mai anō te wā i noho i rō whare herehere i mua i te whakataunga me te whakatau whiu.

Ki te mutu te whakawhiu a te tangata hara, me mātua tuku ia mai i te whare herehere. Kāore e āhei te herea tonutia a ia i rō whare herehere ina mutu tana whakawhiu.

Ka taea te tukuna te tangata hara a mua i te mutunga o tana whiunga mēnā ka whakaaehia he tukuhere. Ka tirohia e te Poari Tukuhere ngā kēhi o te nuinga o ngā tāngata hara me te whakatau mēnā ka pā he mōreareatanga ki te hapori mēnā ka tukuna tōmuatia te tangata hara.

Mēnā he mau tangetange ki te kōhuru te whakatau mō te tangata hara, ka herea ia ki te tukuhere-kore mō te 10 tau te roa i te iti rawa.

I te nuinga o te wā me ū ngā tāngata hara ki ētahi here whāiti a muri i te tukunga ki te tukuhere. E whakatauhia ana ngā here e te Poari Tukuhere, e te kaiwhakawā rānei nāna te tangata hara i whakawhiu. Ka kapi pea i ēnei whakaritenga te wāhi me noho ia, ko wai te hunga ka āhei te whakapā atu, mēnā he rāhui haere pō, me ētahi atu āhukatanga tiaki i te hapori.

KA TAEA TE KŌRERO ATU KI TE POARI TUKUHERE MŌ Ō WHAKAARO MŌ TE TUKUNGA O TE TANGATA HARA

Kia kōrerotia ōu whakaaro mō te tukunga tōmua o te tangata hara, me uru koe ki Te Rēhita Whakamōhio Pāpurenga.

Ka taea te tuku atu ō whakaaro ki te Poari Tukuhere mā te tuhituhi, te hui ataata, ā-tinana rānei:

- **Ā-tuhi, ā-hui ataata rānei**

Me kōrero atu ki tō Poari Tukuhere.

- **Ā-tinana**

Ka hui koutou ko te Poari Tukuhere. Ka kōrero koe ki ērā tāngata anō ka kite i te tangata hara, engari ko te hui e haere ana koe kāore e tū ki te whare herehere, ā, kāore hoki te tangata hara e tae atu. E oti i a koe te mau mai he kaitautoko.

TE KŌTI KAITIROTIRO MATEWHAWHATI

I tua atu i te kēhi kōti, ka whakahaerehia tētahi whakatewhatewha Kaitirotiro Matewhawhati, ā, tērā pea ka tū he whakawātanga i roto i te Kōti Kaitirotiro Matewhawhati. He kōti motuhake tēnei e tirotiro ana ki ngā pūtake me ngā āhukatanga o te mate o te tangata, me ngā mahi ka taea hei ārai i ngā mate i roto i ngā āhukatanga ōrite.

Ka whakamōhiohia koe e Ngā Ratonga Kaitirotiro Matewhawhati mō te whakawātanga, ā, ka kōrero tō pirihimana takawaenga pāpurenga ki a koe mō tō whakawātanga. E oti i a koutou ko tō whānau te haere ki te whakawātanga a te Kōti Kaitirotiro Matewhawhati, engari kāore he here i runga i a koutou ki te haere ki te kore koe i tonoa ki te tuku taunakitanga.

Ka taea ngā tāngata tautoko te haere i tō taha ki te whakawātanga a te Kōti Kaitirotiro Matewhawhati. Waea atu ki Manaaki Tāngata ki 0800 842 846, ki te Waea Mōhiohia Pāpurenga rānei ki 0800 650 654 kia whakaritea tēnei.

Ngā tangata whakapā matua

He tautoko mōu kei ia piko o te ara, e āwhina i a koe kia whakatika i ngā pānga o te taihara. Anei ngā taipitopito whakapā mō ētahi tino ratonga matua. Ka kitea ētahi atu mōhiohio mō ngā ratonga i te Waea Mōhiohio Pārurenga ki 0800 650 654 (24/7), ka haere rānei ki victimsinfo.govt.nz

ACC

acc.co.nz

0800 101 996 Waea Tautoko Kerēme

0800 735 566 Waea Tautoko Kerēme Pāwera (mā ngā pārurenga tūkinotanga taitōkai)

Ngā kaitohutohu pārurenga kōti

0800 650 654 Waea Mōhiohio Pārurenga

Te Ara Poutama Aotearoa (Department of Corrections)

04 460 3000

corrections.govt.nz

Te Poari Tukuhere (New Zealand Parole Board)

0800 PAROLE (727 653)

paroleboard.govt.nz

Te tautoko whaiaro

Tirohia victimsinfo.govt.nz

Ngā Pirihimana

Ka kitea te teihana pirihimana ki tō rohe ki police.govt.nz

Manaaki Tāngata

0800 VICTIM (842 846) 24 hāora i te rā

victimsupport.org.nz

Te Whare Whakaruruhau mō te Wahine

0800 REFUGE (733 843) 24 hāora i te rā

womensrefuge.org.nz

Ētahi kupu ka rangona pea i te kōti

Te utu here (bail)

Ina tukuna he tangata kua whakapaengia ki te taihara e ngā pirihimana, me te here i runga i a ia me haere ki ngā nōhanga kōti ā tōna wā.

Kaitirotiro matewhawhati

Ka whakatauhia e te Kaitirotiro Matewhawhati nōnahea, i hea, i pēhea, me te take i mate ai. Ka whiriwhirihia anō e ia mēnā ka taea te ārai anō i taua momo mate.

Kaitohutohu pārurenga kōti

He kaimahi nō te Tāhū o te Ture ka whakamārama i te hātepe kōti me te whakamōhio haere i ngā pārurenga mō te kauneketanga o mō ā rātau kēhi.

Te whakatuaki

Te tangata e whakapaengia ana ki te taihara.

Te kōhurutanga

Ina kōhurutia he tangata e tētahi atu tangata.

Tangata hara

Te tangata nāna i mahi te taihara. (I mua i te mau tangetange ki te hara, e mōhiohia ana te tangata e whakapaengia ana ki te hara ko ia te 'whakatuaki'.)

Te tukuhere

Ina tukuna tētahi tangata hara i te whare herehere ki te whakamutu i tana whiunga i roto i te hapori. Me mātua whai i ētahi here whāiti.

Te Kaupapa Whakahōrite

E taea ana ngā pārurenga mā te paremata whakahaumanu te kōrero atu ki tētahi tangata hara mō te pānga o āna mahi, te tuku whakaaro mō te whakataurite i te hara, me te tīmata ki te whakarite i ētahi o ngā pānga o te taihara. Ka karangahia he hui paremata whakahaumanu

He taihara nui

- He taihara tūkinotanga taitōkai, tētahi patunga nui.
- He taihara ko te mutunga he wharanga kino, he mate rānei.
- He taihara e noho mātakutaku tonu ana te pārurenga mōna anō, mō te ora rānei o tōna whānau.

Te Rēhita Whakamōhio Pārurenga

He rārangi matatapu ka whakamahia e ngā tari ture taihara hei whakamōhio haere i ngā pārurenga mō te tangata hara, pēnei nā, kei te anga pēhea te kēhi i roto i te hātepe kōti, mēnā ka tukuna rangitahitia mai te tangata hara i te whare herehere, ā, āhea ka wātea mō te tukuhere.


Rēhitahia ō taipitopito ki te pirihimana whakahaere i te kēhi.

Te tauākī pārurenga

He kōrero mō te pānga o te taihara ki a koe. I te nuinga o te wā ka tuhia te tauākī pārurenga, engari ka taea te whakauru whakaahua, tātuhinga, whiti rānei. Me mātua whakaaroarohia e te kaiwhakawā ina whakawhiu ia i te tangata hara. Ka taea e te pārurenga te pānui te tauākī ki te kōti i mua tonu i te whakawhiu.

Te rūma kōti

E whakaatu ana tēnei hoahoa i tētahi tauira o te takotoranga o te rūma kōti, me ngā tāngata ka kite pea koe.



1. **Te kaiwhakawā** – ko ia te rangatira o te kōti. Ka whakatau ia mēnā kei te hara te whakatuaki, ā, mēnā kei reira tētahi rōpū whakawā, ka riro mā te rōpū whakawā kē e whakatau.
2. **Te kairēhita o te kōti**, ka āwhina i te kaiwhakawā me te whakarite kei te whāia tikatia ngā hātepe o te kōti.
3. **Te rōpū whakawā**, he mea hanga ki te 12 tāngata māna te whakatau mēnā i hara te whakatuaki. Ehara i te mea he rōpū whakawā kei ia o ngā whakawā.
4. **Te kaihiu** – māna e whakahaere te kēhi mō te Karauna, e whakatakoto te kēhi ki te whakatuaki.
5. **Te hunga pāpāho** – he kairīpoata e pūrongo ana i te kēhi.
6. **Te rōia o te whakatuaki** ka tū hei māngai mō te tangata e whakapaengia ana.
7. **Te whakatuaki** – te tangata e whakapaengia ana ki te taihara.
8. **Te hunga tautiaki herehere** ka tautiaki i te whakapaenga.
9. **Ahurewa marea** te wāhi e noho ai te iwi whānui me te whānau o ngā pāpurenga, te wāhi noho hoki a ngā kaiwhakaatu a muri i tā rātou tuku taunakitanga.
10. **Kaitohutohu pāpurenga kōti** he āwhina i te kaiwhakaatu kia mārama ai ki ngā hātepe o te kōti. Kāore pea e noho i te kōti i ngā wā katoa.
11. **Kaitautoko a te kaiwhakaatu** te tangata i whakaaehia e te kaiwhakawā hei tautoko i te kaiwhakaatu i roto i te kōti.
12. **Te kaiwhakaatu** – he tuku taunakitanga mō ngā mahi me ngā āhuatanga i pā, mō ōna mōhio rānei mō te taihara.